



Klub poslanika Naša stranka - Nezavisni blok

Broj:

Sarajevo, 16.11.2021. godine

PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM
n/r g. Denis Zvizdić, predsjedavajući

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO:	16-11-2021		
Organizaciona jedinica	Klasifikaciona oznaka	Redni broj	Broj priloga
01-	50-1-	2072	21

Na osnovu čl. 166. i 170. Poslovnika Predstavničkog doma Parlamentarne skupštine BiH upućujem:

POSLANIČKU INICIJATIVU

kojom se traži od **Ministarstva finansija i trezora BiH** da u Nacrt Zakona o porezu na dodatnu vrijednost koji je trenutno u fazi konsultacija:

U članu 47. stav (1) nakon tačke h) uvrsti novu tačku i), koja glasi:

„i) promet dobara za higijensku upotrebu kao što su dječje pelene, podlošci za pelene, pelene za odrasle, higijenski ulošci, tamponi i slični higijenski predmeti,“

U čl. 120. stav (1) nakon tačke doda zarez i uvrsti iduće riječi:

„kao i odredbe Rezolucije Evropskog parlamenta od 15. januara 2019. o ravnopravnosti spolova i politikama oporezivanja u EU (2018/2095(INI)).“,

U čl. 120. stav (2) nakon riječi „direktiva“ uvrsti riječi „i Rezolucije“.

Napominjem da Inicijativu podnosim na osnovu čl. 166. i 170., ne čl. 8. Poslovnika, te molim da se ista u skladu s tim prosljedi navedenom ministarstvu. Molim Inicijativu također dostaviti Direkciji za evropske integracije BiH.

OBRAZLOŽENJE

Bosna i Hercegovina je 2008. godine potpisala Sporazum o stabilizaciji i pridruživanju, a koji je stupio na snagu 2015. godine. Ovim sporazumom BiH se obavezala da će postepeno prilagođavati svoje zakonodavstvo pravnoj stečevini (*acquis*) Evropske unije. Pravnu stečevinu EU čine sudska praksa suda EU, deklaracije, rezolucije i svi drugi pravni akti koje je usvojila EU.

Jedan od tih pravnih akata je Rezolucija Evropskog parlamenta od 15. januara 2019. o ravnopravnosti spolova i politikama oporezivanja u EU (2018/2095(INI)), koja predstavlja važan dokument čije preporuke bi trebali poštivati kao država koja teži EU integracijama. Rezolucijom se napominje da do rodno uvjetovanih predrasuda dolazi kada se područje primjene poreznog zakonodavstva preklapa s područjem rodni odnosa, normi i ekonomskog ponašanja, napominje se da PDV sadrži rodno uvjetovane predrasude zbog obrazaca



Klub poslanika Naša stranka - Nezavisni blok

potrošnje žena, koji se razlikuju od obrazaca potrošnje muškaraca jer žene kupuju više proizvoda i usluga za poboljšanje zdravlja, obrazovanja i prehrane.

Također, pozivaju se sve države članice da ukinu takozvani „porez na njegu i tampone”, iskoriste fleksibilnost uvedenu Direktivom o PDV-u i primijene izuzeće ili stopu PDV-a od 0 % na te osnovne proizvode. Smanjenje cijene zbog izuzeća od PDV-a na te proizvode bilo bi nemjerljivo korisno za mlade žene i žene sa niskim primanjima, a države članice se pozivaju da predvide dodatne zalihe ženskih higijenskih potrepština u određenim (javnim) prostorima kao što su škole, univerziteti i sl.

Jasno je da se stanovništvo Bosne i Hercegovine trenutno nalazi u teškoj ekonomskoj situaciji, cijene osnovnih životnih namirnica se povećavaju, dok primanja ostaju ista ili se pak smanjuju. Sasvim opravdano bi bilo očekivati da će ove izmjene Zakona o porezu na dodanu vrijednost biti usmjerene ka utvrđivanju različitih, nižih stopa oporezivanja za osnovne životne proizvode i usluge, no to nažalost nije slučaj. Neophodno je, međutim, da se barem izbjegne fiskalna diskriminacija jednog spola. Higijenski ulošci, tamponi, ali i pelene za djecu i odrasle, su proizvodi koje isključivo ili u najvećoj mjeri kupuju žene.

Svaka deseta djevojčica ne može priuštiti sanitarne proizvode, higijenski proizvodi za žene te proizvodi i usluge za njegu namijenjeni djeci, starijim osobama ili osobama s invaliditetom još uvijek se ne smatraju osnovnim proizvodima, iako njihovo korištenje nije stvar izbora već potreba. Smatramo da država treba ukinuti porez koji žene plaćaju samo zbog toga što su žene i da ovakve mjere zaista jesu od javnog interesa jer se tiču više od polovine stanovništva BiH.

S poštovanjem,

Damir Arnaut

Poslanik u Predstavničkom domu